



Bentiaraq Ottosen

UPA 2026/130

Atassut

17. Juni 2026

**Pujortartarneq nunatsinni peqqissutsimut annertuumik sunniutipiloqartaqisoq qanoq annikillisarnerusinnaanera pillugu apeqquteqaat aallaavingalugu siunnersuut**

(Inatsisartunut Ilaasortaq Aqqalu C. Jerimiassen, Atassut)

Siullermik oqaatigerusupparput pujortartarnerup nunatsinni innuttaasut peqqissusaannut annertuumik sunniuteqartarnera inuiaqatigiinnut ataatsimut unammillernarsinnaasoq. Taamaattumik qanoq iliornikkut pujortartarnerup annikillisarneqarsinnaanera pillugu oqallinneq politikikkut pingaaruteqarluinnarpoq.

Atassutip politikikkut tunngavigisaa tassaavoq inuiaqatigiit kiffaangissuseqarlutik akisussaassuseqarnissaat, ilaqutariillu nukittuut inuiaqatigiinnut patajaatsumut tunngavissaqarnissaat pingaaruteqartuusoq. Peqatigisaanik Atassutip isumaa naapertorlugu pisortat akisussaaffigaa innuttaasut peqqinnerusumik inuuneqarnissaanut periarfissat pitsaasut atortinneqarnissaat, taamaaliornikkut pilersitsineq pinaveersaartitsinikkut aallarnerlugu ingerlanneqarsinnaavoq. Kisianni eqqaamasariaqarparput pinngitsaaliinikkut pinnani paasissutissiilluarneq, siusissukkullu iliuseqarneq kajumissaarinerlu aqputigineqarsinnaasut.

Pujortartarneq innuttaasut ataasiakkaat peqqissusaannut ajoqqutaasinnaavoq, aammali ilaqutariinikkut inuiaqatigiinnullu aningaasatigut annertuumik kinguneqarsinnaasarluni. Soorlu peqqinnissaqarfitta ajornartorsiornerulernerannut kinguneqarsinnaavoq. Napparsimalernerit siviusuumillu katsorsarneqartariaqalernerit, sulisinnaassutsillu appariarneranut tunngaveqarsinnaapput. Kiisalu eqqaaneqareersutut peqqinnissaqarfiup aningaasartuutaasa qaffanneqaranut tunngavissaqalersitsisumik. Taamaattumik pujortartarnerup annikillisinneqarnissaa inuit ataasiakkaat nammineerlutik akisussaaffigaa, kisianni akisussaassuseqarluni kiffaangissuseqarnerup nammineerluni aalajangigassaraa.

Atassutip pingaartippaa meeqqat inuusuttullu pujortartalernissaat pinaveersaartinneqassasoq. Tamanna anguneqarsinnaavoq angajoqqaat peqatiginerisigut, atuarfiit, peqatigiiffiit inuiaqatigiit akornanni suleqatigiilluarnikkut. Meeqqat pitsaasunik maligassiuisoqanissaat pingaaruteqarpoq, peqqissumillu inuuneq naliginnaasumik ileqquliunneqartariaqartoq isumaqarluta.

Atassutip politikiani atugarissaarneq pisortat ikiorsiinerinnaangilaq. Atugarissaarneq tassaavoq innuttaasut peqqissut, nammineersinnaasut, suliffeqartut ilaqutariinnillu toqqissisimasunik pilersitsisinnaasut. Taamaattumik peqqissuseq namminerli inuiaqatigiillu aningaasaqarneranni pingaaruteqarluinnarpoq.



Pujortartarnerup annikillineratigut napparsimanerit ikinnerulissapput, inuunerup pitsaassusaa qaffassalluni, kiisalu peqqinnissaqarfiup aningaasartuutai sivilunerusumik isigalugu appariarsinnaallutik. Aningaasat taamaalillutik allanik pingaarutilinnik, soorlu meeqqanut, utoqqarnut ilinniartitaanermullu atorneqarsinnaapput.

Atassutip aamma upperaa innuttaasut namminneq akisussaaffimmik tigusinerat inuiaqatigiinnut iluaqutaasoq. Politikki tatiginninneq tunngavigalugu ingerlanneqartariaqarpoq, inuit peqqinnerusumik inuuneqarnissamut periarfissaqarnissaat qulakkeerneqarluni, kisianni nammineq toqqaanissamut kiffaanngissuseqarnerat ataqqineqassalluni.

Naggasiullugu Atassutip erseqqissaatigaa pujortartarnerup annikillisarnissaa pillugu suliniutit ataatsimut isigineqartariaqartut. Ilaqutariit, atuarfiit, suliffeqarfiit, peqqinnissaqarfik politikikkullu aalajangiisartut suleqatigiillutik peqqinnerusumik Kalaallit Nunaannik pilersitsisinnaapput. Meeqqat inuusuttullu pujortartanngitsumik avatangiiseqarnissaat, inersimasullu peqqinnerusumik inuuneqarnissamut periarfissinneqarnissaat tassaavoq siunissamut aningaasaliineq pingaaruteqartoq, inuiaqatigiillu atugarissaarnerulernissaannut aqutissiuussisoq.

Qujanaq oqallilluarisi.